

DIBUNDU KELE KUYIBA NGE?

??

Bantu mingi kele kusamba na dibundu ya kele kuyiba bo. Dibundu ke yiba bo na nki? Dibundu na bo kele kuyiba bo konso ntangu ya bo mbundana. Dibundu na bo kele kuyiba bo na mambu ya dikopa ya masa ya vinu.

Dibundu na bo kele kupesa kaka mampa mpamba, yina ya bo kele kubinga "Yukariste". Kaka rarement bo kele kubaka dikopa ya mbundana. Kieleka, dibundu na bo kele kuyiba bo!

Sambu na nki beto tuba yo? Sambu na nki dikopa ya mbundana kele mfunu? Dikopa kele mfunu sambu Yesu Kristo muntu pesaka yo. Na mpimpa na ntwala Yandi kwendaka na kulunsi, Yandi kudiaka nkinsi ya Paki sikamosi ti balonguki na Yandi. Yandi bakaka mampa, ti pesaka bo ya kudia. Yo songaka mpila nitu na yandi ta vanda kupasuka sambu ya kugulusa bo (Matayo 26:26).

"Yukariste" yina ya bantu ya nkaka kele kudia kele mampa special ya dibundu na bo me sala kaka sambu na mbundana. Yo kele mampa mpamba. Keti Yesu pesaka kaka mampa mpamba? Ikele ve! Na nima bo me dia mampa yina, Yesu bakaka dikopa ya vinu. Yandi sambaka, ebuna yandi pesaka yo ya kunwa. Dikopa yina songaka kuwakana ya Nzambi me wakana ti bantu na menga na yandi, yina ta losana sambu na masumu ya bantu (Matayo 26:27-28).

Yesu pesaka bakristo yonso dikopa ya mbundana. Yandi pesaka bo mambu zole: mampa, ti dikopa ya masa ya vinu. Nki mutindu Yesu pesaka masa ya vinu yina? Keti yandi losaka matonsa ya mbwaki na zu lu ya mampa? Ikele ve. Yandi pesaka bo masa ya vinu na kati ya dikopa, kaka mpila ya bantu ke nwaka yo konso ntangu.

Mampa songaka nitu na Yandi; dikopa songaka menga na Yandi. Yesu pesaka bakristo yonso zole, mampa ti dikopopa. Sambu na nki Yesu pesaka mambu yai zole na bakristo? Yandi pesaka yo sambu ntangu bo mbundana, bo bambuka lufwa na Yandi. "Beno sala mpidiyai sambu na kuyindula mono" (I Korinto 11:24).

Yo kele mfunu mingi nde bakristo kumbambuka menga ya Yesu, sambu kaka menga yina lenda gulusa bo. Na bilumbu ya ntama yo vandaka kieleka nde,, "Nzambi ke lolulaka bantu kaka kana bo me pesa makabu ya menga" (Baebreo 9:22). Na kati ya beto ya me tula ntima ya Yesu, "sambu na menga ya Yesu beto ke na nswa na kukota na kisika ya kuluta nsiku" (Baebreo 10:19). Sambu na menga ya Yesu, beto bakristo lenda kwisa na ntwala ya Nzambi kukonda nsoni to boma. Yo kele mfunu mingi nde beto bambuka ntangu yonso menga ya losanaka sambu na beto!

Ee, bampangi, Yesu zabaka mambu yai. Ebuna ntangu Yandi pesaka beto Mesa ya Mfumu to mbundana, Yandi pesaka bakristo yonso mampa, ti yandi pesaka bo dikopa.



Mono banza nde kana Yesu Kristo Yandi mosi me tuba yo, yo kele diaka ve mambu ya beto lenda solula. Kana kieleka Yandi kele Mfumu na beto, mbote beto lemfuka na yina ya Yandi me tuba. Nani muntu ya lulendo ta tuba nde yandi ke zaba kuluta Yesu Kristo?

Kansi dibundu ya nkaka kele kuyiba bantu na mambu yai, sambu bo ke landaka mbote-mbote ve malongi ya Bible. Kana nge kota na misa na bamimpe, nge ta mona dikopa ya vinu na zulu ya mesa na bo. Kansi na ntangu ya bantu baka mbundana, nani ke nwa dikopa ya vinu yina? Ketu yo kele bakristo yonso, na mpila ya Yesu songaka beto kusala? Kele ve. Yo kele kaka nganga-Nzambi na bo ya kele kunwa yo. Bakristo na bo ke baka kaka mampa mpamba, yina ya bo ke binga "Yukariste."

Mbala na mbala nganga-Nzambi na bo lenda lomba nzila ya bamfumu na ntwala na yandi, bo kangula nzila sambu mukristo kubaka mpe dikopa na fete ya nene. Mbandu: na misa ya makwela. Kansi bantu kuluta mingi ta baka dikopa ya mbundana ata mbala mosi ve na moyo na bo ya mimpe ke pesaka dikopa na bakristo mingi ve. Yo kele mawa mingi na kumona nde mukristo fweti lomba nzila na kusala mbala mosi mpamba yina ya Yesu songaka beto kusala konso ntangu!

Mbandu ya nkaka: dibundu Neo. Bo kele kusumba mampa na bo ya kele na matonsi tatu ya mbwaki ya zulu na yo. Bo ke tuba nde matonsi yina kele vinu, ke songa menga na kati ya nitu ya Yesu. Bo lenda tuba konso mutindu, kansi questio ya nene kele yai: Ketu yai kele mpila Yesu pesaka mbundana? Yo kele ve. Dibundu ya Neo kele kuyiba bantu na bo, sambu bo kele kulanda ve malongi ya Yesu. Bo kele kupesa ve dikopa ya mbndana na bantu na bo.

Sambu na nki bo ke sala mbundana ve na mpila Yesu pesaka yo? Mambu ve nki raison bo lenda pesa. Ata bo tuba konso mutindu, mambu ya kieleka ikele nde Yesu pesaka dikopa na bakristo yonso. Kana dibundu ya mimpe zenga mutindu ya nkaka, yo ke monika nde bo ikele na mayele ku luta Mwana-Nzambi! Bambuka, bampangi, Nzambi ke tuba nde Yandi kele mbeni ya bantu ya lulendo (Yakobo 4:6).

Bampangi, ketu nge kele na kiese nde dibundu na nge kuyiba nge na mambu ya dikopa ya mbundana? Bampangi, yo kele mambu ya kuyituka kana muntu kuyamba muyibi na nzo na yandi.

Kansi bakristo lenda sala nki? Ketu dibundu ikele yina ya kele kulanda to kulemfuka na ndinga ya Yesu-Kristo na mambu ya mbundana? Ketu dibundu ikele ya kele kuyiba bakristo ve na mambu na dikopa ya mbundana?

Ee. Bampangi, yo ikele kuyiba bo. Mawa na bantu ya ndima nde dibundu lenda kuyiba bo mutindu yina! Kansi dibundu ikele ya ke yibaka bantu ve na mambu yai. Dibundu yai, bo kele kubinga yo dibundu ya misioni to Protestant, yo kele dibundu ya bakristo ya ke ndima Yesu Kristo. Yo kele dibundu ya kele kusosa na mambu yonso kulemfuka na Ndinga ya Nzambi. Bo ikele kuyiba bakristo ve na mambu ya dikopa ya mbundana. Mbala ya nkaka yo ta vanda mfunu na kusolula ti pasteur to longi ya misioni na bwala na nge. Yandi ta vanda na malongi ya mbote ya lenda sadisa nge. Nki nge banza sambu na mambu yai?